



ქალაქ თბილისის საკრებულო



გ ა დ ა ო რ ე ნ ი ა № 8-49

“ 9 ” ივლისი 2010 წ

ქ. თბილისი

№ 05
 საქართველოს იუსტიციის
 სამინისტრო
 შეტანილია ნორმატიული აქტების
 სახელმწიფო რეესტრში და მინიჭებული
 ამჟამის სახელმწიფო სარეგისტრაციო კოდი
 “ 19 ” 07 2010წ.
 № 010.220.020.36.101.000.090

ქ. თბილისის საკრებულოს გარემოს დაცვის კომისიის დებულების დამტკიცების შესახებ

1. „საქართველოს დედაქალაქის – თბილისის შესახებ“ საქართველოს კანონის მე-12 მუხლის „ა“ ქვეპუნქტის თანახმად ქ. თბილისის საკრებულომ გადაწყვიტა დამტკიცდეს ქ. თბილისის საკრებულოს გარემოს დაცვის კომისიის თანდართული დებულება.

2. გადაწყვეტილება ძალაშია გამოქვეყნებისთანავე და მისი მოქმედება ვრცელდება 2010 წლის 9 ივლისიდან წარმოშობილ ურთიერთობებზე.

საკრებულოს თავმჯდომარე *გ. სიგია*

ზაალ სამადაშვილი

დანართი

დამტკიცებულია
ქ. თბილისის საკრებულოს
2010 წლის 9 ივლისის
№8-49 გადაწყვეტილებით

ქ. თბილისის საკრებულოს გარემოს დაცვის

კომისიის დებულება

თავი I

ზოგადი დებულებები

მუხლი 1.

1. ქ. თბილისის საკრებულოში (შემდგომში – საკრებულო) გარემოს დაცვის საკითხთა შესწავლის მიზნით შექმნილია ქ. თბილისის საკრებულოს გარემოს დაცვის კომისია (შემდგომში - კომისია).

2. კომისია თავისი კომპეტენციის ფარგლებში შეიმუშავებს და საკრებულოს წარუდგენს სამართლებრივი აქტების პროექტებს.

3. კომისია თავის საქმიანობას ახორციელებს ამ დებულების, საკრებულოს რეგლამენტისა და სხვა ნორმატიული აქტების საფუძველზე.

თავი II

კომისიის სტრუქტურა, კომპეტენცია და კომისიის

წევრთა უფლებამოსილებანი

მუხლი 2.

1. კომისიის შემადგენლობა განისაზღვრება საკრებულოს არანაკლებ 5 წევრით.

2. კომისიის შემადგენლობას, კომისიის თავმჯდომარის წარდგინებით ამტკიცებს საკრებულო.

3. კომისიის წევრი შეიძლება იყოს მხოლოდ საკრებულოს წევრი.

მუხლი 3.

1. კომისიის კომპეტენციას განეკუთვნება სამართლებრივი აქტების პროექტების მომზადება და/ან წარმოდგენილ პროექტებზე დასკვნის მომზადება იმ საკითხებთან დაკავშირებით, რომლებიც ეხება:

ა) დედაქალაქში გარემოს დაცვას;

ბ) გარემოს დაცვის სფეროში ერთიანი სახელმწიფო პოლიტიკის გატარებისათვის ხელშეწყობას;

გ) დედაქალაქში გარემოს დაცვის და ბუნებრივი რესურსების ეფექტიანად გამოყენების მიზნით უცხოური ინვესტიციების მოზიდვას;

დ) დედაქალაქში გარემოს დაცვის ღონისძიებათა აქტიურ პროპაგანდას, სხვადასხვა გარემოსდაცვითი პროგრამების შემუშავებას;

ე) დედაქალაქში გარემოს არსებული მდგომარეობის შესწავლა-შეფასებასა და მისი გაუმჯობესების მიზნით ღონისძიებათა განსაზღვრას;

ვ) დედაქალაქში ბუნებრივ გარემოზე საწარმოო საქმიანობის ზეგავლენას;

ზ) დედაქალაქის გამწვანება-განაშენიანებას, დაზიანებული და განადგურებული ტერიტორიების აღდგენას;

თ) დედაქალაქის ტერიტორიაზე საგანგებო ეკოლოგიური სიტუაციების აღკვეთასა და პროფილაქტიკური ღონისძიებების შემუშავებას;

ი) დედაქალაქის ტერიტორიაზე წიაღისა და წიაღისეულის დაცვასა და აღწარმოებას.

2. კომისია:

ა) თავისი კომპეტენციის ფარგლებში ამყარებს ურთიერთობებს საქართველოს, უცხოეთისა და საერთაშორისო ორგანიზაციებთან და სახელმწიფო ორგანოებთან;

ბ) აქტიურად თანამშრომლობს მასობრივი ინფორმაციის საშუალებებთან და არასამთავრობო სექტორთან;

გ) განიხილავს ფიზიკურ და იურიდიულ პირთა განცხადებებსა და საჩივრებს და ახდენს სათანადო რეაგირებას;

დ) ამზადებს რეკომენდაციებსა და წინადადებებს მის კომპეტენციას მიკუთვნებულ საკითხებთან დაკავშირებით და მათ წარუდგენს საკრებულოს ან გზავნის დანიშნულებისამებრ;

ე) ახორციელებს ამ დებულებით და სხვა ნორმატიული აქტებით დადგენილ უფლებამოსილებებს.

მუხლი 4.

1. კომისიის წევრს უფლება აქვს:

ა) თანაბარ საწყისებზე მონაწილეობდეს კომისიის მუშაობაში, განსახილველ საკითხზე გამოთქვას შენიშვნები, მოსაზრებები და წარმოადგინოს წინადადებები;

ბ) აირჩიოს და არჩეულ იქნეს კომისიის თანამდებობებზე;

გ) ნებისმიერ დროს გავიდეს კომისიის შემადგენლობიდან.

2. კომისიის წევრი ვალდებულია:

ა) მონაწილეობა მიიღოს კომისიის მუშაობაში;

ბ) არ გაახმაუროს სახელმწიფო საიდუმლოების შემცველი ან კონფიდენციალური ინფორმაცია;

გ) შეასრულოს კომისიის მიერ მისთვის დაკისრებული მოვალეობები.

თავი III

კომისიის სხდომები

მუხლი 5.

1. კომისიის სხდომების პერიოდულობას განსაზღვრავს კომისია, მაგრამ არანაკლებ თვეში 1 სხდომისა. კომისიის მორიგი სხდომა მოიწვევა წინასწარ განსაზღვრულ დროს. კომისიის მორიგი სხდომის გამართვის დროს განსაზღვრავს კომისიის თავმჯდომარე.

2. კომისიის სხდომა უფლებამოსილია, თუ მას ესწრება კომისიის სიითი შემადგენლობის უმრავლესობა.

3. კომისიის წევრები ვალდებული არიან დაესწრონ კომისიის სხდომას და მონაწილეობა მიიღონ მის მუშაობაში. ამ მოთხოვნის დარღვევა გამოიწვევს რეგლამენტით გათვალისწინებულ პასუხისმგებლობას.

4. გადაწყვეტილება მიიღება ღია ან ფარული კენჭისყრით, სხდომაზე დამსწრე კომისიის წევრთა ხმების უმრავლესობით. ღია კენჭისყრის დროს ხმების თანაბრად გაყოფისას გადამწყვეტია სხდომის თავმჯდომარის ხმა.

5. კომისიის სხდომა საჯაროა. განსაკუთრებულ შემთხვევაში კომისია მართავს დახურულ სხდომას. დახურული სხდომის გამართვის შესახებ გადაწყვეტილება მიიღება კომისიის სიითი შემადგენლობის უმრავლესობით.

6. კომისიის სხდომას სათათბირო ხმის უფლებით შეიძლება დაესწრონ საკრებულოს წევრები, ქ. თბილისის მთავრობის წევრები და მოწვეული სხვა პირები. კომისიის სხდომაზე დასასწრებად შეიძლება მოწვეულ იქნენ დაინტერესებული პირები, რომელთაც სხდომის თავმჯდომარის გადაწყვეტილებით მიეცემათ სიტყვით გამოსვლის უფლება. კომისიის სხდომაზე დასასწრებად ასევე შეიძლება მოწვეულ იქნენ დადგენილი წესით აკრედიტებული მასობრივი ინფორმაციის საშუალებათა წარმომადგენლები.

მუხლი 6.

1. კომისიის სხდომაზე განიხილება კომისიაში შემუშავებული და შემოსული სამართლებრივი აქტების პროექტები, მოქალაქეთა საჩივრები და განცხადებები, მთავრობის წევრთა და თანამდებობის პირთა ახსნა-განმარტებები და სხვა საკითხები.

2. კომისია იღებს რეკომენდაციას, დასკვნას, წინადადებას.

3. კომისიის დასკვნები, როგორც წესი, წარედგინება საკრებულოს სხდომას ან იგზავნება დანიშნულებისამებრ.

4. საკრებულოს წინაშე ანგარიშვალდებული ორგანოების თანამდებობის პირები კომისიის მოთხოვნით ვალდებული არიან კანონმდებლობით დადგენილ

ვადაში წარადგინონ შესაბამისი დოკუმენტები, დასკვნები და სხვა საჭირო მასალები.

5. საკრებულოს მიერ არჩეული და დანიშნული თანამდებობის პირი უფლებამოსილია, ხოლო მოთხოვნის შემთხვევაში ვალდებულია, დაესწროს კომისიის სხდომებს, პასუხი გასცეს სხდომაზე დასმულ შეკითხვებს და წარადგინოს გაწეული საქმიანობის ანგარიში. ასეთ თანამდებობის პირს მოთხოვნისთანავე უნდა მოუსმინოს კომისიამ.

მუხლი 7.

საკრებულოს თავმჯდომარის მოთხოვნით ან შესაბამისი კომისიების გადაწყვეტილებით შეიძლება გაიმართოს კომისიების ერთობლივი (საკონსულტაციო) სხდომა. ერთობლივ სხდომაზე განხილულ საკითხებთან დაკავშირებით კომისიები ცალ-ცალკე, კენჭისყრით იღებენ შესაბამის გადაწყვეტილებას.

თავი IV

კომისიის თანამდებობის პირები

მუხლი 8.

1. კომისიის თავმჯდომარეს თავისი შემადგენლობიდან სიითი შემადგენლობის ნახევარზე მეტით ირჩევს საკრებულო.

2. კომისიის თავმჯდომარე:

ა) იწვევს, ხსნის და წარმართავს კომისიის სხდომებს;

ბ) უზრუნველყოფს საქართველოს კანონმდებლობით, საკრებულოს რეგლამენტითა და ამ დებულებით დადგენილი პროცედურების დაცვას;

გ) ადგენს კომისიის სხდომის დღის წესრიგის პროექტს, განსახილველ საკითხზე გამოსვლის მსურველთა სიას, საკრებულოს რეგლამენტითა და ამ

7

დებულებით დადგენილი წესით განსაზღვრავს გამომსვლელთა რიგითობას და აძლევს მათ სიტყვას;

დ) სვამს საკითხს კენჭისყრაზე და აცხადებს კენჭისყრის შედეგებს;

ე) ხელს აწერს კომისიის სხდომის ოქმებს;

ვ) მოქმედებს კომისიის სახელით;

ზ) ანგარიშვალდებულია საკრებულოს წინაშე;

თ) ახორციელებს საქართველოს კანონმდებლობით, საკრებულოს რეგლამენტით და ამ დებულებით განსაზღვრულ სხვა უფლებამოსილებებს.

3. საკრებულო კომისიის უფლებამოსილების ვადით ირჩევს კომისიის თავმჯდომარის მოადგილეს (არა უმეტეს 2 მოადგილისა).

4. კომისიის თავმჯდომარის მოადგილის კანდიდატურის დასახელების უფლება აქვს საკრებულოს წევრს.

5. კომისიის თავმჯდომარის მოადგილე (მოადგილეები):

ა) ასრულებს კომისიის ცალკეულ დავალებებს;

ბ) კომისიის (სიითი შემადგენლობის უმრავლესობის) დავალებით ასრულებს კომისიის თავმჯდომარის მოვალეობებს მისი გადადგომის, გადაყენების ან მის მიერ უფლებამოსილების განხორციელების შეუძლებლობის შემთხვევაში.

მუხლი 9.

1. კომისიის თავმჯდომარე საკრებულომ შეიძლება გადააყენოს თანამდებობიდან. კომისიის თავმჯდომარის გადაყენების საკითხი საკრებულოს წინაშე წერილობით შეიძლება დასვას საკრებულოს თავმჯდომარემ, ბიურომ, საკრებულოს სიითი შემადგენლობის არანაკლებ ერთმა მესხუთედმა, შესაბამისი კომისიის შემადგენლობის ორმა მესამედმა.

2. კომისიის თავმჯდომარე გადაყენებულად ჩაითვლება, თუ წინადადებას მისი გადაყენების შესახებ მხარი დაუჭირა საკრებულოს სიითი შემადგენლობის ნახევარზე მეტმა.

3. კომისიის თავმჯდომარეს შეუძლია ნებისმიერ დროს, ყოველგვარი ახსნა-განმარტების გარეშე განაცხადოს თავისი გადადგომის შესახებ. შესაბამისი განცხადება წარედგინება საკრებულოს თავმჯდომარეს, რომელიც მას გააცნობს საკრებულოს. კომისიის თავმჯდომარე გადამდგარად ითვლება განცხადების საკრებულოს თავმჯდომარისათვის წარდგენის დღიდან.

4. კომისიის თავმჯდომარის გადადგომის, გადაყენების ან მისი, როგორც საკრებულოს წევრის, უფლებამოსილების ვადამდე შეწყვეტის შემთხვევაში საკრებულო უახლოეს სხდომაზე, რეგლამენტით გათვალისწინებული წესით ირჩევს კომისიის ახალ თავმჯდომარეს.

თავი V

კომისიის სამდივნო

მუხლი 10.

1. კომისიის საქმიანობის უზრუნველსაყოფად იქმნება საკრებულოს აპარატის მუდმივი სტრუქტურული ერთეული, რომელიც ექვემდებარება შესაბამის კომისიას.

2. კომისიის სამდივნო:

ა) ორგანიზებას უწევს კომისიის სხდომების მომზადებას, მიღებული გადაწყვეტილებებისა და სხდომათა ოქმების გაფორმებას;

ბ) ახორციელებს საკონსულტაციო და ანალიტიკურ ფუნქციებს, ორგანიზაციულ-ტექნიკურ მომსახურებასა და საქმისწარმოებას;

გ) მუშაობს კომისიის დებულებით განსაზღვრულ საკითხებზე, ასრულებს კომისიის თავმჯდომარისა და კომისიის დავალებებს;

დ) ასრულებს საქართველოს კანონმდებლობით, საკრებულოს აპარატის დებულებითა და ამ დებულებით განსაზღვრულ სხვა ფუნქციებს.

3. კომისიის თავმჯდომარესთან შეთანხმებით კომისიის სამდივნოს უფროსი საკრებულოს აპარატის უფროსს წარუდგენს კომისიის სამდივნოს სტრუქტურასა და საშტატო ერთეულთა რაოდენობას.

4. კომისიის სამდივნოს შემადგენლობაში შედიან კომისიის სამდივნოს უფროსი, კომისიის სამდივნოს სპეციალისტები (საშტატო ნუსხით გათვალისწინებული მოსამსახურეები) და შტატგარეშე მოსამსახურეები (მოწვეული სპეციალისტები).

5. კომისიის თავმჯდომარესთან შეთანხმებით კომისიის სამდივნოს უფროსი წარუდგენს აპარატის უფროსს კომისიის სამდივნოს მოსამსახურეთა წახალისებისა და მათთვის დისციპლინური პასუხისმგებლობის ზომების შეფარდების წინადადებებს.

6. კომისიის სამდივნოს თანამშრომლებს, “საჯარო სამსახურის შესახებ” საქართველოს კანონით დადგენილი წესით, კომისიის თავმჯდომარესთან შეთანხმებით, სამდივნოს უფროსის წარდგინების საფუძველზე ნიშნავს და ათავისუფლებს საკრებულოს აპარატის უფროსი.

თავი VI

დასკვნითი დებულებები

მუხლი 11.

კომისიის დებულებაში ცვლილებებისა და დამატებების შეტანა ხდება “ნორმატიული აქტების შესახებ” საქართველოს კანონით დადგენილი წესით.